



賓頭盧突羅闍爲優陀延王說法緣經

請賓頭盧經

大勇菩薩分別業報略經

宋天竺三藏求那跋陀羅譯

宋三藏慧簡譯

宋天竺三藏僧伽跋摩譯

賓頭盧突羅闍爲優陀延王說法緣經、請賓頭盧經、大勇菩薩分別業報略經



清刻龍藏佛說法變相圖

三經同卷

續八

賓頭盧突羅闍爲優陀延王說法緣經

請賓頭盧經

大勇菩薩分別業報略經

賓頭盧突羅闍爲優陀延王說法緣經

續八

宋天竺三藏求那跋陀羅譯

欲樂味甚少憂苦患甚多是以智者應修方便速離衆欲勤行淨行我昔曾聞千福王子名優陀延紹父王位住拘舍彌城其城殊妙寬博嚴淨晃爛宮觀映飾綺麗牕牖通疎交絡珠網樓觀千萬莊校此城街巷相當阡陌齊整市肆充盈多諸珍寶其城周市有好林苑樹木翠蔚華果茂盛泉流清潔生衆蓮華青黃赤白文色相映鴻鴈鴛鴦孔雀鸚鵡迦

陵頻伽命命之鳥其聲相和猶如樂音莊嚴之盛如寄羅婆山王崇巖峻嶽而自莊嚴又像帝釋所居喜見之城優陀延王形貌端正威相具足聰明點慧武勇絕倫才技兼修靡所不知善能呪象令諸山象咸來赴集又能控御皆令調順又善彈琴和雅中節宮商相應鳥獸率舞合衆香丸用降怨敵香氣所及盡來歸順善能刻畫曲得相貌其所圖像真形無異六十二藝悉皆備具衣服飲食不尚豐奢矜窮敬老存恤民庶正法治國日夕忘倦禮儀法律一依古典如昔哲王什奢之等國富民殷庫藏盈溢福德之人集生其國受王風化咸皆修善博通經學明解諸論世間典籍無不綜練勇健雄武如羅摩延阿純之等由王先身辟支佛所種諸善根獲報如是

王之威德隣國畏伏道化光被聲聞天下時輔相子名賓頭盧突羅闍姿容豐美世所希有聰明智慧博聞廣識仁慈汎愛志存濟苦勸化國民盡修十善信樂三寶出家學道得具足果遊行教化還拘舍彌城欲度親黨徧行乞食乞食已訖於林樹下結跏趺坐思惟入定時有一人識賓頭盧來白王言昔輔相子賓頭盧者今近在此林中樹下王聞歡喜心懷敬仰便勅嚴駕將諸宮人眷屬僕從詣尊者所問訊既竟命王就坐王即思惟所有疑事今當問之而作是言賓頭盧今我與爾少小知舊汝之祖先世爲輔相聰明智達常爲國師今既相造欲問疑事非相惱觸爲我說不尊者答言恣今所問我當爲王分別解說王以偈問曰

一切世人貪著五欲縱情放逸以自娛樂如汝今者獨處空閑捨離恩愛有何榮樂尊者答言我觀因緣皆悉無常是故出家以割情愛樂於林藪猶如野鹿專心勤修未斷煩惱以智慧斧破愛樹枝心無戀著毒果消滅諸結駛流生死暴河我已得渡更無憂患譬如飛鳥得免羅網凌虛遠逝名曰解脫王聞斯語語賓頭盧今我勢力能伏諸國威德暉赫有如盛日首戴天冠瓔珞盛服姝女侍衛如天帝釋汝今獨處頗羨我不尊者答言我無羨心王復問言何故於我而不願羨尊者答言我於今日欲泥已乾諸有結縛今已解脫乃至帝釋諸妙天女不生羨尚況汝人間鄙穢者乎誰有智者得離魔縛渡生死岸得淨慧眼壞無明闇而羨王耶何有明眼羨

於盲者何有強健而羨病患何有無罪而羨獄囚何有巨富羨於貧窮何有高貴而羨奴僕何有智者羨於愚癡何有勇健羨於懦弱王聞是已心懷懊惱而作是言汝作方喻一何苦劇我寧困劣乃是乎尊者答言王無慧眼煩惱所病四取駛流之所漂沒失於勇健不能精勤如斯嬰愚不識真諦沉淪苦海是王之分於五欲中生希有想如此之想實違淨行王復問言有何等過而言違失尊者答言此五欲者衆苦之本害於衆生所有善根如電害苗螫惱衆生甚於毒蛇亦如熾火能燒功德亦如野馬誑惑凡夫亦如幻化迷亂惑者欲詐親善過於怨家欲如老牛沒溺淤泥欲如大網纏裹三界欲如劒道難可履蹈欲能繫閉殺害衆生一切過患皆從欲起

如往古時有婆須天由欲因緣爲婆利阿脩
羅之所繫縛擲沸湯中婆勒天壞阿修羅城
郭殄滅其民惱觸苦婆羅王種八純提王及
彼百子悉皆誅滅鼻多羅阿脩羅害於千眼
羅摩害十頭羅刹及數千億羅刹之衆羅漫
害因陀羅具翼又王摩羅支王滅多摩羅質
種族迦帝毗爲閻摩尼婆羅門所殺毗那悉
那害提頭賴吒眷屬班紉五子殺十八億人
彌匿安毒多羅躡伽王種俱羅王種彌締羅
檀特伽王種是等人王皆爲欲故更相殘滅
即說偈言

增八

王位雖尊嚴 代謝不暫停 輕疾如電光
須臾歸磨滅 王位極富逸 愚者情愛樂
衰滅死時至 苦劇過下賤 王者居高位
名聞滿四方 端正甚可愛 種種自嚴身

譬如臨死者 著華鬘瓔珞 餘命未幾時
王位亦如是 王者譬如鳥 常懷諸恐怖
行住及坐卧 乃至一切時 於其親疎中
恒有疑懼心 臣民官妃后 象馬及珍寶
國土諸所有 一切是王物 諸王捨命時
皆棄無隨者 人王及天王 阿脩羅王等
威力逼人民 斧鉞相殘害 不識無常苦
橫增貪疾惱 譬如妙華林 金蛇睡在中
愚人謂珍寶 盛衰實歸家 蛇覺縱毒火
焚燒其屋宅 王位如華林 災患如金蛇
愚人以爲貴 智者所不樂 譬如以搏肉
置四衢道頭 狐狼鵲鷲等 競來爭食之
王位亦如是 衆共爭取之 鳥獸以紫爪
爪獸共鬭諍 王者以刀矛 相害諍榮位
亦如彼鳥獸 愚癡等無異 我寧食灰土

增八

五

果菜以自存 此身如癰瘡 會歸當潰爛
云何爲此故 造作衆惡業 如食菴婆果
香味悉具足 及其果消時 身體盡爛壞
王位如彼果 失滅生苦惱 譬如有方土
災疫行疾病 有智諸勝人 宜應速遠離
若不遠離者 如逆風執炬 不捨必自燒
如渴飲鹹水 無有飽足時 如十頭羅刹
城郭及眷屬 爲欲因緣故 滅壞無遺餘
又如寄越王 兄弟有百人 爲欲因緣故
亦皆盡敗滅 日種繫趙王 及提頭賴吒
如是諸王等 盡爲欲所滅
當知國土猶如羅網亦如羅網如深淤泥亦
如洄波又如海浪如林被燒亦如危岸猶如
地獄誰有智者當樂貪著如是大苦誰有智
者當生樂想如是大王嗚呼怪哉被欺乃爾

被誑乃爾猶如空拳誑於小兒速疾不停猶
如幻化五欲欺誑亦復如是猶如猿猴在高
山頂見雲彌布以爲堅實謂爲是地便以身
投墮百丈巖喪其身命一切碎滅亦如野干
見甄叔迦樹其果似肉見落地時便往欲食
知其非肉更復生念今此非肉彼樹上者必
當是肉遂便守之爲其所困五欲誑王亦復
如是亦如商賈以僞珠誑人五欲誑王亦復
如是又如嬰愚嗜味食歡喜九人以泥團而
來誑之謂爲真實走逐疲苦乃得泥團如熱
時焰誑渴愚夫猶如衆人前豎於幻楸能使
時衆見種種事若拔幻楸色像即滅猶如畫
匠及機關師如狗吠井自見形影怒眼豎毛
謂井底影欲共已鬪橫生瞋忿投井而死大
王宜善觀察何有五欲而得常者何有王位

而得久停尊豪威勢無得住者何有國界而
不遷壞何有珍寶而不散失何有欲樂常恒
不變苦之封授必受衰滅何有合會而不別
離一切五欲體性實苦皆從妄想而生於樂
何有諸行不似芭蕉乾闥婆城大王云何處
生老病死衰禍恐怖逼迫之中云何能爲國
土少樂生愛樂想如林中鹿四邊火起如鳥
在籠如魚處網如龜吞鉤如師子毒箭入心
如龍處呪場如人在屋中四邊火起如處危
朽華堂速疾崩墜如好華池有水羅刹喻食
於人重說偈言

生老病死患 於中未解脫 無明愛毒箭
猶未得拔出 人帝汝云何 而生樂著想
如象處林中 四邊大火起 處此急難處
云何有歡樂 大王應當知 榮位須臾間

智者深觀察 不應於此事 而生希有想
汝何故錯解 實是愛奴僕 而生高貴想
捨上妙財寶 而生大富想 不善解方便
橫生智慧想 爲衆煩惱患 橫生無病想
未脫生死胎 橫生無畏想 處十二刺林
橫生無刺想 欲賊劫諸根 橫生無賊想
大王而此身者必歸敗壞尊豪榮貴必有衰
滅財寶庫藏必有散失大王如佛言日榮位
如寢恩愛暫有汝於五欲生於希有難遭之
想賢德於此豈得名爲能善觀察何以故榮
位恩愛必有別離如衆飛鳥夜栖一樹晨則
四散又如客舍夕則聚賓明各異路亦如乘
船異人同載既至岸已各自殊道亦如駛流
漂集衆木須臾之間隨流分散猶如浮雲須
臾散滅作音樂處男女聚集作樂已訖各自

散去宮人姝女端正美妙無常理會會歸捨
棄譬如華樹蜂集其上華彫落盡諸蜂遠離
如華池枯涸特象不入如大池水鶴樂遊居
及其乾竭更不復近福盡之家榮利不近如
密雲聚集電光暫現如風吹雲電光不現彼
不捨汝汝必捨之如似夏盡孔雀毛羽悉皆
自落如寒既至鴻鶴遠池如阿輸伽樹華葉
盛時人所愛樂及其枯悴無有華葉人不顧
視猶如華幢貴者愛敬華萎縷絕而使棄之
即說偈言

無常不堅固 如芭蕉水沫 亦如浮雲散
天王尊勝位 危脆亦如是 人帝應當知
貪利極速駛 如水注深谷 嗜欲極輕疾
動轉如掉索 愚癡深爲谷 不覺致墮落
尊者言大王我今爲王略說譬喻諸有生死

苦味過患王至心聽昔日有人行在曠路逢
大惡象爲象所逐狂懼走突無所依怙見一
丘井即尋樹根入井中藏有白黑鼠牙齧樹
根此井四邊有四毒蛇欲螫其人而此井下
有大毒龍傍畏四蛇下畏毒龍所攀之樹其
根動搖樹上有蜜五滴墮其口中于時動樹
撐壞蜂巢衆蜂散飛咬螫其人有野火起復
來燒樹大王當知彼人苦惱不可稱計王愁
憂厭惡而言彼人得味甚少苦患甚多其所
味者如牛跡水其所苦患猶如大海味如芥
子苦如須彌味如螢火苦如日月如藕根孔
比於大虛亦如蚊子比金翅鳥其味苦惱多
少如是尊者言大王曠野者喻於生死彼男
子者喻於凡夫象喻無常丘井喻於人身樹
根喻人命白黑鼠者喻晝夜齧樹根者喻念

念滅四毒蛇喻四大蜜者喻五欲經蜂喻惡
覺觀野火燒者喻老下毒龍者喻死是故當
知欲味甚少苦患甚多生老病死於一切人
皆得自在世間之人身心勞苦無歸依處衆
苦所逼輕疾如電是可憂愁不應愛著大王
今我語王言雖麤惡實是利益王聞是語衣
毛皆豎悲喜交集涕泣流淚即起合掌五體
投地白尊者言我之嬰愚無有智慧我之下
賤作斯狂言如是狂言聽我懺悔尊者言我
於今者以忍出家無不忍受我心清淨猶如
境八秋月淨無雲翳王今懺悔願使大王猶如天
九帝得見道跡王大歡喜與諸眷屬作禮還宮
賓頭盧突羅闍爲優陀延王說法緣經